



Il maletg da brenta e nivlas da l'ascenziun sin il Piz Kesch.

FOTO ARNO MAINETTI

## Da piz tar piz tar piz

Ir en muntogna e fotografar quellas aventuras è sia gronda passiuin. Arno Mainetti raquinta en ses cudesch «Piz um Piz II» intginas anecdotes da sias experientschas alpinas. Il cudesch illustrà è vegnì edì avant insaquantas emnas. En connex cun il di internaziunal da las muntognas, ils 11 da december, dat la FMR in'invista en in cudesch plain tensiuin e passiuin.

SANDRA BALZER/FMR

Gia per la deschnovavla giada vegn festivà damaun il di internaziunal da las muntognas (guarda box). Punctualmain è cumparì dacurt il cudesch illustrà «Piz um Piz II» dad *Arno Mainetti* (77) da Cuira, oriund dad Andeer. Cun quest segund tom cuntinuescha el la seria da sias muntognas preferidas. Sin radund 100 paginas preschenta l'autur purtrets ed istorgias persunalas da diesch muntognas dal Grischun.

### L'entschatta d'ina gronda passiuin

Cun esser creschì si ad Andeer ha Arno Mainetti ina relaziun zunt speziala cun il Grischun Central, perquai na fai betg surstar, ch'el ha scuvrì precis là la passiuin per la natira e las muntognas. Igl è stà ses padrin Kasper che ha prendì Arno Mainetti cun el per l'emprima tura sin il Piz Beverin en la Val Schons. En ses cudesch raquinta Arno Mainetti exact da quell'aventura sco mattet dad otg onns: La notg cun il runtgem dal padrin en sia acla Molas sur Andeer, la mini-biblioteca cun lectura alpina en l'acla ed il svegliarin ch'ha scalinà la damaun a las trais. Igl èn las pitschnas anecdotes da sia emprima aventura alpina che diverteschan la lectura ed il lectur. Saja quella davart

il signun da l'alp Curtginatsch che scusseglia ina tala tura cun in mattet dad otg onns u las emoziuns da padrin e figliol cura ch'els eran arrivads sin il piz. «El ha stratg mai sin quest piz. Igl era forsà ina «numra memia gronda», jau anc fitg giuven, il padrin gia fitg vegl. Ma la fin finala èsi i bain. Dal reminent è quai stà la davosa tura che mes padrin ha fatg», raquinta Arno Mainetti en il discurs cun la FMR.

### Enviern l'avust

Sut il titel «Il retg tranter ils retgs» preschenta Arno Mainetti cun il Piz Kesch il pli aut piz da las alps d'Alvra ed uschia davairas in piz roial. L'autur descriva passaschas e sequenzas davart differentas ascenziuns: Quella giada cura ch'el è ascendì solo, vul dir senza esser segirà dad in partenari. U quella giada l'avust 1985 cura ch'i ha navì. Igl è la moda da raquintar dad Arno Mainetti però er il maletg da brenta e nivlas che procura per in sentiment dad esser al puls da quests dus eveniments.

### Il roman dals romans

Il Piz Lagrev sin il Pass dal Güglia unescha las ragischs latinis: en l'ost vegn discurre puter, en il vest surmiran ed en il sid bergagliot. Quest piz è en emprima lingia l'enviern fitg popular.

La plipart dals skiunzs sa cuntentescha cun il piz che sa chatta radund ina mes'ura avant il piz principal – però betg Arno Mainetti. Malgrà ina nauscha experientscha sin quest toc cusseggia el sut «Arnos Tipp» da visitar il piz principal. Arno Mainetti era crudà ina giada d'in curnisch da naiv nauagiu. Per sa deliberar è el i sin tuts quatter e cun fadia puspè enavos sin la cresta. Quest mument descriva el en ses cudesch sco l'entschatta dad ina segunda vita.

### Las istorgias da tai e da mai

La basa per ses cudesch èn las pitschnas istorgias divertentas, però er delicatas, che Arno Mainetti parta en furma da texts e fotografias cun lecturas e lecturs. Tgi che tschertga in guid da muntogna classic vegn a stuair far diever d'in auter cudesch. Il cudesch illustrà dad Arno Mainetti porscha bain l'in u l'auter tip alpin – igl èn però las istorgias alpinas da tai e da mai che dattan al cudesch ina nota persunala e motiveschan forsà era l'in u l'auter lectur da nudar ed illustrar las atgnas istorgias alpinas.

Suandantas muntognas èn illustradas e descrittas en il cudesch «Piz um Piz II»: Piz Beverin, Piz Palü, Chapütschin, Gletscherhorn, Flüela Schwarzhorn, Piz Du-an, Piz Kesch, Piz Lagrev, Piz Terri e Tiejer Flue.


## Il di da las muntognas

Damaun, ils 11 da december, vegn festivà il di internaziunal da las muntognas. Dapi l'onn 2002 ch'era deditg a las muntognas ha la radunanza generala da las Naziuns unidas decidì da deditgar quest di a las muntognas. Il di duai animar d'organisar differentas occurrenz per preschentar la muntada extraordinaria da las regiuns alpinas. Era duai la publicitad vegnir sensibilisada per la vitalitad sin terra.

**Dal reminent: quest onn organisescha il Club alpin svizzer ensemen cun autras uniuns alpinas preschentaziuns sut il motto «(Alp)-Träume». L'occurrènz ha lieu damaun en il Museum alpin svizzer a Berna.**

## L'alpinist

Naschì l'onn 1944 e creschì si ad Andeer ha *Arno Mainetti* gia sco uffant scuvert sia passiuin per las muntognas. Sia passiuin per fotografar e l'alpinissem ha l'architect giudì cun esser stà sin numerus pizs da tut ils continents. Davart sia raschun per questa passiuin di Arno Mainetti: «Paucs alpinists san dir cun paucs peds, pertge ch'els van en muntogna. Jau hai ditg: Lura stuais vus leger mes cudesch, alura savais pertge.» Oz viva Arno Mainetti cun sia dunna a Cuira. Els han dus uffants creschids.



Arno Mainetti preschenta ses segund tom «Piz um Piz II».

FOTO MAD